

積學齋叢書

第

冊

續學齋叢書

卷一

詩

水經釋地卷八

曲阜孔繼涵誦孟

漸江水

漸江水出三天子都北過餘杭

秦始皇三十七年置屬會稽郡東漢分屬吳郡舊治
苕溪北熹平中徙治溪南去舊城半里吳黃武五年
分屬東安郡七年歸吳郡寶鼎元年分屬吳興郡隋
屬餘杭郡宋熙寧初復治苕溪北屬臨安府今屬杭
州府 海內東經曰浙江出三天子都在其東吳任
臣注云浙江之名前此未有始于山海經水經酈注
漸江卽浙江也吳越春秋越王至浙江之上望見大

越山川重秀天地再清史記云水至會稽山陰爲浙江又云秦始皇至越唐臨浙江口肇云浙者折也蓋取其潮出海屈折倒流也一名羅刹江又名浙河莊子所謂浙河之水有吞天沃日之勢謝康樂云浙河之外棲遲山澤是也郭子章郡縣釋名云又名曲江七發曰將以八月之望觀濤于廣陵之曲江曲迺折之謂也然南齊書言南兖州刺史每以秋月出海陵觀濤則曲江自在廣陵非浙江明矣又一統志引經云三天子山在率東率山今在休寧縣俗名張公山何喬遠輿地記云休寧縣山曰率山水曰率水山海經浙江出三都山在率東蓋此山也今本無此文

東入于海

桓水

桓水出蜀郡岷山西

秦置漢屬益州晉武帝改成都國尋復隋初曰益州
開皇二年置西南道行臺省三年復置總管府大業
元年府廢爲蜀郡屬梁州唐至德二載曰南京爲成
都府上元元年罷京屬劍南道太平寰宇記云武德
元年改益州置總管府管十九州三年罷總管府置
西南道行臺九年罷行臺置都督府督十州龍朔元
年升大都督府天寶元年改蜀郡仍爲大都督府督
劍南三十六郡至德二載駕還西京分爲劍南東川

西川各置節度使廣德元年并東西川爲一節度使
宋屬劔南西川節度太平興國六年降爲益州端拱
元年復爲劔南西川成都府淳化五年降爲節度嘉
祐五年復爲府治成都帶成都路安撫使元至元十
三年立成都路隸四川行中書省明洪武初改府隸
四川布政司

南行羌中

陳芳績曰松州禹貢梁州兼雍州域爰劔諸羌居焉
後漢西羌傳曰西羌本出三苗蓋姜姓之別種其國
近南岳及舜流四凶徙之三危今河關之西南羌地
是也有爰劔者秦厲公時爲秦所執以爲奴隸後得

亡歸其後子孫各爲種或爲犛牛種越雋羌是也或爲白馬種廣漢羌是也或爲參狼種武都羌是也至爰劍曾孫忍獨留湟中忍子研後爲研種漢景帝時有留何求守隴西寨于是徙留何等于狄道安故研後至燒當其子孫更以燒當爲種號滇良者子滇吾父子强盛常雄諸羌在晉內附以其地屬汶山郡宋齊亦得之後爲西魏所有魏白水羌像舒治者自稱鄧至王據此地其子舒彭遣使朝貢乃拜龍驤將軍甘松縣開國子周保定五年罷龍涸防天和元年改置扶州領龍涸郡

入于南海

葉榆河

益州葉榆河出其縣北界

漢屬益州郡明帝永平十二年分牂榆屬永昌郡後
主建興二年分屬雲南郡宋屬東河陽郡齊仍西阿
郡亦有葉榆縣後無元憲宗七年立太和城千戶所
至元二十六年置河東縣爲理州治後改太和縣屬
大理路其地亦爲浪穹詔居之卒爲南詔所并立浪
穹州元立浪穹千戶所至元中改縣屬鄧川州明太
和縣爲大理府治有太和城在大理南十五里卽南
詔徙治所

屈從縣東北流過不韋縣

漢武帝時哀牢國內附置不韋縣屬益州郡東漢分屬永昌郡晉仍後無明洪武十三年復置不韋縣置鳳溪長官司屬永昌軍民府鳳溪山在治東酈注云不韋縣北去葉榆六百餘里榆水不逕其縣自不韋北注者盧倉禁水耳

東南出益州界入牂牁郡西隨縣北爲西隨水

漢屬牂牁郡宋屬梁水郡隋已後無

又東出進桑關過交趾蒼泠縣北

漢屬交趾郡都尉治女子徵側爲主處馬援平之晉曰麋泠爲新昌郡治隋以後無

分爲五水絡交趾郡中至東界復合爲三水東入海

溫水

溫水出牂牁夜郎縣

漢故夜郎侯邑臨牂牁江都尉治建寧二年分屬興古郡晉永嘉五年爲夜郎治兼立充州隋沒于蠻唐武德四年置夜郎縣六年省貞觀十六年復置屬珍州元和三年改屬濛州宋大觀二年復置屬濛州宣和三年廢在今桐梓驛西二十里

又東至鬱林廣鬱縣爲鬱水

漢屬鬱林郡吳更名陰平縣仍屬鬱林郡梁爲定州治唐初屬貴州麟德二年爲鬱林州治宋開寶四年省入興業陳芳績曰宋書云開寶四年改鬱林誤在

今貴縣境

又東至領方縣東

漢屬鬱林郡吳更名臨浦縣晉武帝復名領方建武
元年分屬晉興郡宋仍屬鬱林郡梁爲領方郡治唐
武德四年屬南方州貞觀五年爲賓州治宋與州同
移舊城北廢琅邪縣明省入賓州在今遷江縣境
與斤員水合東北入于鬱

存水

存水出犍爲郁郾縣

漢屬犍爲郡後漢省晉曰存駝屬建寧郡唐初曰都
郾武德二年省三年復置天寶元年更名義賓縣屬

戎州南溪郡宋太平興國元年更名宣化熙寧四年
省入夔道爲鎮宣和元年復置屬敘州元元貞二年
于縣置屬戶府後省在今宜賓縣境陳芳績曰案寰
宇記宜賓縣本漢南安縣地屬犍爲郡蜀諸葛亮南
征于此置郁郅戍後改爲郁郅縣唐開元十七年爲
義賓縣後移于狼川卽今理也本朝開寶九年改爲
宜賓疑有舛誤

東南至鬱林定周縣爲周水

漢屬鬱林郡三國無

又東北至潭中縣注于潭

漢屬鬱林郡晉書爲桂林郡首縣齊更名齊熙并爲

熙郡及東寧州治陳芳績曰齊爲熙郡見廣西通志
按宋書無潭中齊之桂林郡仍有潭中齊熙郡無屬
縣亦無寧州隋開皇十八年更名義熙爲融州治大
業初并屬始安郡唐武德四年爲融州治六年更名
融水縣五代初屬楚後屬南漢明洪武初降融州爲
縣以融水縣省入屬柳州府

浪水

浪水出武陵鍾成縣北界沅水谷南至鬱林鍾中縣與
鄰水合又東至蒼梧猛陵縣爲鬱溪

漢元封五年置屬蒼梧郡晉穆帝分屬永平郡隋開
皇十八年省入豪靜隋末蕭銑復改置孟陵唐貞觀

八年改屬梧州光化中馬敘表屬桂州五代初屬楚
晉乾祐三年屬南漢宋省入蒼梧在今蒼梧境

又東至高要縣爲大水

漢屬蒼梧郡宋改屬南海郡梁高要郡治隋信安郡
治唐端州治宋肇慶府治

又東至南海番禺縣西分爲二

秦始皇三十三年置交州及南海郡治後尉佗都吳
廣州及南海郡治隋開皇十三年省入南海唐長安
中復置遷河南洲上今名盧循城宋開寶五年省入
南海皇祐三年復置遷附廣州東城明屬廣州府漢
縣在廣州府南五十里唐縣在廣州府城南十里

其一南入于海其一又東過縣東南入于海其餘水又東至龍川爲涅水

秦置屬南海郡晉咸和六年分屬東莞郡梁屬梁化郡隋開皇十一年省入河源唐武德五年復置貞觀元年省入歸善今之龍川縣乃晉太和三年析龍川縣置名雷鄉縣屬永平郡隋省入河源唐天授二年復置屬循州南漢更名龍川爲循州治明洪武二年改屬惠州府

屈北入員水員水又東南千五百里入南海

戴氏云自其餘至員水十六字近訛入注內考注稱浪水枝津衍注卽解其餘水也又稱逕博羅縣西界

龍川卽解東至龍川也下經員水又東南卽承此員水言也

灘水

灘水亦出陽海山南過蒼梧荔浦縣

漢元鼎中析臨賀荔江之地置屬蒼梧郡三國分屬始安郡唐武德中爲荔州治貞觀中復屬桂州宋屬靜江府明初屬桂林府宏治四年改屬平樂府

又南至廣信縣入于鬱水

漢屬蒼梧郡治後漢刺史治隋開皇初更名蒼梧屬封州唐武德四年爲梧州治明梧州府治陳芳績曰肇慶志云舊封川在今縣西一里舊府志則謂漢廣

信縣在今縣西一里梁改梁信隋改封川唐武德四年又改封興宋開寶六年復改封川洪武二年遷縣治于州治縣址遂爲民居是以舊封川縣卽舊廣信縣也一統志則謂漢廣信縣爲蒼梧郡治隋初改蒼梧縣屬封州舊唐書亦云則封川實漢廣信地未必遂爲縣治又按封興劉宋以廣信地置隋大業省入封川非以封川改封興也又有都樂縣城通志及府縣志謂在封川防場鄉都樂村唐宋屬康州考唐書宋史俱無此縣豈立而卽廢之乎或卽都城

涯水

涯水出桂陽縣廬聚